

समे – 12:25 hrs.

PM-MKB

प्रधानमंत्री नरेन्द्र मोदी होरें अज्ज अपने रेडियो कार्यक्रम मन की बात दे 126में ऐपीसोड राहें देश-बदेश दे लोकें कन्नै अपने बचार सांझो कीते। इस मौके पर प्रधानमंत्री होरें शहीद-ए-आज़म भगत सिंह ते स्वर कोकिला खोआने आहली म्हान गायिका लता मंगेशकर होरेंगी उं'दी जयंती पर श्रद्धांजलि अर्पित कीती। श्री मोदी होरें इस मौके पर भगत सिंह होरेंगी भारत दे नौजवानें लेई प्रेरणा दा स्रोत करार दिता ते आखेआ जे भगत सिंह होर निडर देशभक्ति दे प्रतीक हे। उं'ने आखेआ जे नरातें दे इस पावन पर्व दरान अस सब्बै शक्ति दी उपासना करने आं ते एह पर्व महिला शक्ति दे उत्सव दा जशन मनाने दा पर्व बी ऐ। प्रधानमंत्री होरें आखेआ जे देसै दिआं धीआं अज्ज हर खेतर च भामें बपार थमां खेड्डें दी गल्ल होऐ जां फही शिक्षा थमां विज्ञान दे खेतर दी गल्ल, साढ़ी नारि शक्ति अज्ज हर खेतर च अपनी ताकत दा लोहा मनवा करदी ऐ। अपने अज्जै दे मन की बात कार्यक्रमै च श्री मोदी होरें आखेआ जे साढ़ा हत्थखड्डी ते दस्तकारी दा खेतर बी बड़े महत्वपूर्ण बदलाव दे दौर चा लंग्घा करदा ऐ। उं'ने आखेआ जे अज्ज देसै च ऐसी केई मिसालां सखल्लें दिक्खियां जाई सकदिआं न जेहिड़ियां इस गल्लै दा सबूत न जे जिसलै परंपरा ते नमिएं काहडें दा आपूं-चै मेल होंदा ऐ तां नतीजे बड़े बड्डे ते शानदार होई सकदे न। प्रधानमंत्री होरें देशवासियें दा आह्वान कीता जे ओह महात्मा गांधी हुंदे आसेआ दस्सी गेदी आत्मनिर्भरता दी बतै पर अगड़े बधन। उं'ने आखेआ जे खादी, साढ़े स्वदेशी अभियान दी प्रतीक ऐ ते लोकें गी लोड़चदा ऐ जे ओह मुकामी उत्पादें दी खरीददारी

करदे होई देसै दी अर्थबवस्था ते विरासत गी मजबूती देने दा कम्म करन। श्री मोदी होरें इस मौके पर देशवासियें गी औने आहले त्यौहारें दिआं ममारखां बी दित्तिआं।

<><><><><><>

LG-Summon

लेफ्टिनेंट गवर्नर मनोज सिन्हा होरें जम्मू-कश्मीर विधानसभा दी बैठक 23 अक्टूबर 2025 गी बड्डलै 10 बजे श्रीनगर च सददी ऐ। जम्मू-कश्मीर विधानसभा दे सचिव हुंदे आसेआ जारी एह नोटिस जम्मू-कश्मीर पुनर्गठन कन्न, 2019 दी धारा 8 (1) दी पालमा करदा ऐ। सब्बने मिम्बरें गी गुजारिश कीती जंदी ऐ जे ओह जम्मू-कश्मीर विधानसभा च प्रक्रिया ते कम्मकाज सरबंधी नियमें दे नियम 3 मताबक इस सत्र च हिस्सा लैन।

<><><><><><>

Dy CM Job Fair

उपमुख्यमंत्री सुरिन्दर चौधरी होरें कल जम्मू दे कन्वेंशन सेंटर च मिशन युवा दे तैहत इक बड्डे रोजगार मेले दा उद्घाटन कीता। जम्मू-कश्मीर रोजगार विभाग आस्सेआ आयोजित इस कार्यक्रम च 2 हजार 200 कोला मते बेरोजगार युवाएं हिस्सा लैता ते 55 कम्पनिएं आसेआ 1500 कोला मती नौकरिएं दी पेशकश कीती गई। डिप्टी सीएम होरें आक्खेआ जे मिशन युवा रोजगार, उद्यमिता ते हुनर विकास दे राएं नौजवानें गी सशक्त बनाने दा इक परिवर्तनकारी जतन ऐ। उनें मिशन युवा ऐप राएं प्रमुख डिजिटल प्लेटफार्में दी बी शुरुआत कीती ते युवा उद्यमिएं गी मंजूरी पत्र बंडे।



Seva Parv

मुख्य भरै च औंदी 2 अक्टूबर तोहड़ी मनाई जा'रदी सेवा पर्व आहली पैहलकदमी दे तैहत अज्ज अस तुसैंगी दस्सगे जे किस चाल्ली नरेन्द्र मोदी सरकार ने अटल पेंशन योजना दे राहें भारत दे गैर-संगठित खेतर दे कार्यबल लेई समाज सुरक्षा गी मजबूत बनाने दा कम्म कीता ऐ। ब'रे 2015 च रम्भी गेदी अटल पेंशन योजना अज्ज भारत दे गैर-संगठित खेतर दे कार्यबल लेई समाज सुरक्षा दा इक मजबूत थम्म बनी गेदी ऐ। मजूदा समें च इस योजना कन्नै 8 करोड़ शा मते लोक जुड़े दे न। ग्रामीण इलाकें दे बसनीके ंतोहड़ी मजबूत पुज्ज ते डिजिटल एकीकरण दे कन्नै एह योजना, गरीब लोकें गी रटैर होने पर माली सुरक्षा दी गरंटी दि'दी ऐ।



Prog. Announcenent

आकाशवाणी दा क्षेत्रीय समाचार एकांश जम्मू “सेवा पर्व 2025” दे तैहत अपने विशेष कार्यक्रमें दी श्रृंखला दे इक हिस्से दे तौरा पर कल सोमवारें 29 सितम्बर गी 25एं मिन्टे दी इक विशेष परिचर्चा प्रसारत करने जा रदा ऐ, जेहदा विषय रखेया गेदा ऐ- “दफा 370 ते 35ए गी खत्म करने बाद पूरे जम्मू खिते च सेहत ढांचे ते सेवाएं च बदलाव”। इस कार्यक्रम च स्हाड़े परौहने होडन नारायणा सुपर स्पेशलिअि अस्पताल, कटड़ा च ऑर्थोपेडिक्स विभाग दे सीनियर कंसल्टेंट डॉ. विकास पाधा जेहड़े इस विषय दे बक्ख-बक्ख पहलुएं पर अपने विचार

सांझे करडन। इंदे कन्नै गल्लबात करडन स्हाड़े न्यूज एंकर श्रुति खजूरिया ते कुणाल श्रीवतस। एह कार्यक्रम कल सोमवारें 29 सितंबर 2025 गी दपैहरी 12 बजे स्हाड़े इस्सै चैनल पर मीडियम वेव 303 मीटर यानी 990 किलोहर्टस ते थड 100 इशारिया 3 मैगाहर्टस पर प्रसारत कीता जाहग।

<><><><><><>

GST-Electronics

नमीं पीढ़ी दे जीएसटी सुधारें तैहत केन्द्र सरकारै केई सारी चीजें पर टैक्स दी दरें गी घट्ट कीता ऐ ते इंदे च उपभोक्ताएं दे इस्तेमाल आहिलयां चीजां ते गड्डियां वगैरा बी मुख तौर पर शामिल न। जंदी 22 सितम्बर थमां घरें च इस्तेमाल होने आहली इलैक्ट्रानिक चीजें जि'आं एयर कंडिशनरें, डिश वाशरें ते बड्डी स्क्रीन आहले एलईडी टेलीविजनें पर जीएसटी दी दर गी 28 फीसद शा घटाइयै 18 फीसद करी दिता गेआ ऐ। इस्सै चाल्ली 350 सीसी तगर दे इंजन दी समर्थ आहले दो-पहिया वाहनें सने 1200 सीसी शा हेठली समर्थ दिएं लौहकी पेट्रोल कारें पर जीएसटी दी दर गी घटाइयै 18 फीसद कीता गेआ ऐ। इस गैह दा मकसद एकड़ी चीजें गी मता किफायती ते पुज्जत आहला बनाना ऐ।

<><><><><><>

Asia Cup

एशिया कप टी-20 क्रिकेट दे फाइनल च अज्ज भारत दा मुकाबला पाकिस्तान कन्नै होगं एह मैच भारती समें मूजब रातीं 8 बजे शुरू होग। एह मैच दुबई च खेडेआ जाग। एशि कप

दे 41 बरें दे इतिहास च एह पैहला मौका होग जिसलै दवें टीमां फाइनल खेडन। भारत हुनै तगर 8 बारी एशिया कप दा खिताब अपने नांस करी चुके दा ऐ। इस बारी प्रतियोगिता च दवें टीमां त्रीस बारी आमने-सामने होडन।